

# ZAPÓSLANE

Jan Bart z Budyšina, nestor serbskeho rěčneho projekta Witaj, piše:

Dóstach přeprošenje Serbskeho šulskeho towarstwa na swjedžen 25lětneho wobstaća modeloweho projekta Witaj w pěstowarni „Mato Rizo“ w delnjołužiskim Žyłowje. Swjatočnosć wotměje so 29. septembra 2023.

Wobžaruju jara, zo njemóžu so wysokeje staroby dla wobdžělic. Tuž jara, jara wutrobnje gratuluju k wurjadnemu podawkej slěbornych narodnin kubłanišća, kotrež ze serbskej rěčnej imersiju džěla. Wulki džak a připóznaće nětčišim a džensnišim kubłarkam, maćerjam a nanam Witaj-džěci a wězo tež wotpowědnym zamołwitym wosobinam za wutrajnu prócu a podpěru w běhu štwórc lětstotka!

Rady bych awtentiske hłosy a nazho-njenja zběrał w rozmołwje na planowanej swjedženskej „kjarmuši“. Wosebje mje wězo tež zajimuju zetkanja z bywšimi Witaj-džěćimi, kiž wšak su mjeztym dorostli. Čakam a wjeselu so tuž na wobšěrne rozprawy w serbskich medijach.